

Inyarubha ya kabhiri ya Paauru kwa Abhatisaruniki Ubhukangati

Ibhaga isuuhu kwima Paauru atumi inyarubha yaazi ye embere, akabhona amang'ana kubha, abhiisirirya bha Tisaruniki bhatubhuriri bhwaheene amiija gaazi agandi. Abhandi bhakakina Yisu aari amariri kugaruka. Na abhandi bhaari bhatigiri emeremo jabhu jasi, ku kubha bhakiisega Yisu angagarukiri ribhaga ryaryasi. Abhandi bhatindiri kohocha emeremo ku kubha yu uku-niha. Paauru akaandika inyarubha ya kabhiri, koreke achuri amiisigi ncha gayo, ganu gataari na amaheene. Mnyarubha ya kabhiri yinu akandikijiryi kubha, Yisu aari akiiri kugaruka kuusi na akabhakandikija kong'eha kohocha emeremo kumucha.

Amakeeren'ya

¹ Inyarubha yinu nandikiri inyi Paauru, hamwimwi na Sirwanu* na Timoseo. Turabhaandikira imwi abhiisirirya bha urubhiri rwa Tisaruniki, mwiribhita rya abhaatu bhanu mwisiriiryi Bhaabha Mungu nu Umukuru Yisu Kiriisitu.

* **1:1 Sirwanu** arabhirikirwa *Siira* mukitabhu cha Amahocha ga Abhatumwa.

² Ibhigungi no omorembe kurwa kwa Bhaabha Mungu na kuMukuru Yisu Kiriisitu, bhibhi na nimwi.

Abhiisirirya bharahaabhwa umwuy ribhagari inyaaku

³ Abhahiiri bhitu, toreenderwa kukumya Mungu ibhaga ryasi iguru waanyu, ku kubha ubhwisirirya bhwanyu bhurakura bhukung'u, naatu akusiigana kwanyu kurang'eha kwaruha.

⁴ Na niitwi turiiheema mamasengerero ga Mungu, ku kubha yu ubhwigumirirya nu ubhwisirirya bhanu manabhwi, manyaaku yusi yinu manyayo.

⁵ Gayo gusi gareereken'ya, itiniru ya Mungu ne-ye eheene. Katiniru yiyo imwi marabharwa na marindibhwa kubha mubhatimi bhwazi,† bhanu mukunyaakibhwa iguru wabhwi.

⁶ Mungu arakora ge eheene, arabhaha inyaaku bhanu bhakubhanyaacha

⁷ na kubhaha umwoyeero bhanu mukunyaaka, hamwimwi na niitwi. Arakorabhu, hanu Umukuru Yisu akuuza kurwa mwisaaru hamwimwi na bhamaraika‡ bhaazi bha amanaga,

⁸ ni imiringiri jo omorero. Yisu newe akubhatinira bhusi bhanu bhakwanga Mungu, na bhanu bhatakwisirirya Ing'ana Inzamu ya Umukuru witu Yisu.

⁹ Inyaaku yaabhu irabha ubhuriki bhwa kemerano na kutuurwa kore na Umukuru nu ubhukuru bhwa ubhunaja bhwazi.

† 1:5 **Ubhatimi bhwazi.** Kumaragirira bhukung'u, rora ring'ana ubhatimi bhwa Mungu muKiniibhasa. ‡ 1:7 **Bhamaraika.** Kumaragirira bhukung'u, rora ring'ana maraika muKiniibhasa.

¹⁰ Inyaaku yiyo irabha urusiku rana Umukuru akuuza kukumibhwa na ukusung'aana ubhusuuku kurwa kubharindu\$ bhaazi bhanu bhamwisiriiryi. Na niimwi kwiki marabha mubhayo, ku kubha mwisiriiryi amang'ana garya twabhariitiri.

¹¹ Kugayo tarabhasabhira ibhaga ryasi, korereke Mungu wiitu agiryi mwikari kuring'aana nu ubhubhirikirwa bhwanyu. Naatu taramasabha, amari amang'ana amazamu guusi ganu mukwenda kokora kubhunaja bhwazi, na amari emeremo janyu jasi ju ubhwisirirya.

¹² Terasabha, korereke iriina ryu Umukuru wiitu Yisu ribhi rirakumibhwa iguru waanyu. Na niimwi mubhi marakumibhwa iguru waazi, ibhigangi bhya Mungu wiitu na bhyu Umukuru Yisu Kiriisitu.

2

Umukuru Yisu araaza kuricha umwangi

¹ Nangu abhahiiri bhiitu, tarabhasabha iguru wu ukuuza ku Umukuru wiitu Yisu Kiriisitu, na chimbu turiibhiringi kwewe.* Tarabhasabha,

² mutakangwa na kubha na uruhaho, urusiku rwu ukuuza Umukuru ruhikiri. Hamwi mwigwiribhu kamang'ana obhorebhe gu ubhurauti, hamwi gu ubhurwazi, hamwi gi inyarabha yinu ikwiseegwa iruuri kwa niitwi.

³ Mutisirirya amautu wawusi kubhakangirirya kwa ryaryasi, ku kubha urusiku ruyo rutakuhika, kuhika zisiku zirya abhaatu bhakwanga Mungu

§ **1:10 Abharindu.** Kamaragirira bhukung'u, rora Ikinibhasa.

* **2:1** Rora 1 Abhatisaruniki 4:17.

nu umwangi wurya† arorekani. Wuyo newe akurichwa chwe.

⁴ Nawe hinga araanga ebhegero bhyusi bhinu abhaatu bhakorora kubha ni-mungu hamwi kinu bhakosengera, na ariitura iguru wa bhyusi. Arasikira na kwikara mwihekaaruru rya Mungu, na kwikurya kubha ewe newe Mungu.

⁵ Mutakuhiita hanu naari hamwimwi na niimwi nikabhabhaurira gayo guusi?

⁶ Na nangu mwizi kinu kekomorecha, korereke irikinibhwi ribhaga rinu rikwindibhwa.

⁷ Nuru nangwinu umwangi wuyo arakora emeremo inu iibhisiri. Nawe atakororekana kuhika wanu akomorecha hanu ariruushibweho.

⁸ Hayo neho umwangi wuyo ariirikinibhwi, Umakuru Yisu aramwita nu umwika kurwa munywa gwazi, na aramuricha nu ubhwiru bhu ukuuza kwazi.

⁹ Ribhaga ryu ukuuza kwazi, umwangi wuyo araaza na amanaga guusi ga Shitaani‡ no okokora ibhyirikin'yu na amateemo gu ururimi.

¹⁰ Arabhakangirirya kwa nzira yuyusi, bhanu bhusi bhari munzira yu ukubhura, ku kubha bhatiisiriiryi kusiga amaheene korereke bhatari kusabhurwa.

¹¹ Necho Mungu abhiisiriiryi bhakangatibhwi na amanaga ga amakangirirya, korereke bhang'ehe kwisirirya ururimi.

† 2:3 **Umwangi wurya**, enzobhooro yaku nu-mwangi wa Kiriisitw wanu ahaanga Mungu na kukira imigiru jazi jasi. Umwangi wanu atangi Shitaani, nawe arahakiribhwa na Shitaani kubhwindi bhwazi bhu ukwanga Mungu. ‡ 2:9 **Shitaani**. Kamaragirira bhakung'u, rora Ikiniibhasa.

12 Mmbe bhūsi bhanu bhatakwisirirya amaheene na kozomererwa ubhubhi, bharatinirwa.

Kwimirira bhwima

13 Nawe itwi, toreenderwa kukumya Mungu ribhaga ryasi, iguru waanyu, imwi abhahiiri bhanu masigirwi na Umukuru Yisu. Toreenderwa kokorabhu, ku kubha Mungu akabharobhora imwi kwima isimaka yu ubhubhumbi korereke mobhone ubhutuurya. Ubhutuurya bhuyo mubhusung'aaniri kwa kubhingukibhwa ne Egoro Indindu na kanzira yu ukwisirirya amaheene.

14 Mungu akabhabhirikira, korereke mobhone ubhutuurya bhuyo kanzira yi Ing'ana Inzumu yinu twarwaziri kwa niimwi. Abhabhirikiiri korereke mobhone kugwatana mubhwiru bhwu Umukuru witu Yisu Kiriisitu.

15 Nangu abhahiiri bhitu, mwimiriri bhwima na kugwata amiija ganu mwasung'aaniri, ibhi ni-kwa amaragirira gitu hamwi kuzinyarubha kurwa kwa niitwi.

16 Umukuru witu Yisu Kiriisitu umwene na Bhaabha witu Mungu wanu atusigiri, na kubhigangi bhyazi aratohon'ya kemerano na kotoha ubhwisigi ubhuzumu.

17 Turabhasabha bhabhahi umwuyu na kubhakong'ya, korereke muturi kugamba na kokora amazumu.

3

Pauru arasabha bhabhasabhiri kwa Mungu

1 Nangu abhahiiri bhitu mutusabhiri, korereke amang'ana iguru wu Umukuru Yisu gang'ehe

kunyaragana bhwangu na gasuukwi, chimbu gaari kwa niimwi.

² Mutusabhiri korereke Mungu atusabhiri mubhaatu abhabhi, ku kubha bhatari bhushi bhanu bhakwisirirya amang'ana gayo.

³ Nawe Umukuru, ne-moheene, ewe arabhakong'ya imwi na kubhariibha kurwa kwa Shitaani.

⁴ Naatu aratoha ubhwisigi bhukuru iguru waanyu, nangu marakora garya twabharagin'yi, na marakaja kugakora.

⁵ Umukuru akangati zekoro zaanyu mubhushiigi bhwa Mungu na mubhwigumirirya bhwa Kiri-isitu.

Amaangirijũ igũũ wũ ubhutubhu

⁶ Abhahiiri bhiti, tarabhaswaja kuriina ryũ Umukuru Yisu Kiriisitu, mataani na abhahiiri abhatubhu, bhanu bhatakutuna amiija ganu twabhahiiri.

⁷ Tarabhugabhu, ku kubha imwi mwizi chimbu ikwenderwa kwiga ekerenjo chitu. Hanu itwi twari na niimwi, tataari bhatubhu,

⁸ na twari tutakurya ibhyakurya kumutu wawushi bhaha. Twari tarahocha emeremo kwa mucha ubhutiku nu umwise, korereke tutanyaacha amutu wawushi gati waanyu.

⁹ Tukakorabhu, itari ku kubha tutiindirwi kobhona kegero kurwa kwa niimwi, nawe tokeenda tubhi ekerenjo kwa niimwi korereke mutwigi.

¹⁰ Na hanu twari hamwimwi na niimwi, tukabhaswaja, "Umutu wũũ atakwenda kohocha emeremo, atarya."

¹¹ Tubhugiri amang'ana gayo, ku kubha twigwiri bhareho abhandi gati waanyu abhatubhu, bhatakokora ryaryasi, nawe bhariisikirya mamang'ana ga abhandi.

¹² Abhaatu bhayo turabharagan'ya na kubharecha kubhanaja bhwa Umukuru Yisu Kiriisitu, bhahoché emeremo kubhuhuriu, korereke bhabhi ni ibhyakurya bhyabhu abheene.

¹³ Nawe imwi abhahiiri bhiitu, mutaniha kokora amazumu.

¹⁴ Ariibhi umuutu atakwenda kugwata amaswaja giitu ganu gari manyarubha yinu, mwiyangariri bhukung'u. Mutagwatana nawe, korereke asuki.

¹⁵ Nawe mutamorora nchu umubhisa, mubhi mramorecha nchu umukindichanyu.

Amang'ana gu ukwaga

¹⁶ Nangu, Umukuru wo omorembe umwene, abhahi omorembe ibhaga ryasi kuzinzira zusi. Ewe abhi hamwimwi na niimwi bhusi.

¹⁷ Niinyi Paauru nirabhaandikira amakeeren'ya ganu kokobhoko kwani inyimwene. Ruyo nerwe urukaamu muzinyarubha zaani zusi, na nimbu nihaandika.

¹⁸ Ibhigangi bhyu Umukuru wiitu Yisu Kiriisitu, bhibhi hamwimwi na niimwi.

**Ubhuragi Ubhuhya Mukigambũ chi Ikikiizũ
Ikizu: Ubhuragi Ubhuhya Mukigambũ chi Ikikiizũ (New
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553